

furrer werdent sy lassen volgen und widergeben der vesten und thachtlanie ze Montenach alle ertrich lehen und underlehen renten diensten und manschafften rechtsamen herlikeiten dörffer und ander ding so vor zitten der vesten zugehörunge gewesen sind und furrer wan die Friburger als bös cristen und gott nit forchtent und hant zerstört violiert und verhönt die kilchen ze Montenach und sin heltumen; ze bessrung der ubeltett werdent sy wider buwen und antwort die selben kilchen in guttem statt, darian gemäll tun malen als denn geordnet wirdet die durch unsern forchtsamisten herren die da betutent in sunderheit die ubeltett so die von Friburg da und anders getan hand und werdent stifften ein capell die doturt sige mit dryn messen täglich ze celebrierend ze trost und hilf den selen dero so die von Friburg böslich ertöt und ermurt hand in diesem krieg.

Item die benempten von Friburg werdent dem egenanten unserm aller forchtsamisten herren von Sauoe wider ingeben die vogtye ze Altenriff so unserm forchtsamisten herren zugehört und dieselben von Friburg unrechtlich innenhand und bekumbertt.

Item dieselben von Friburg werdent widergeben her Guillmen von Dauenche, Anthon du Salweit und dem bastard von Pictigne alle ire gütter liegantz und varentz so sy inn genomen hand in welchem weg es sie.

Item werdent me antwurten in unsers forchtsamisten herren gewalt alle sin undertann und mann und ander die da gütter lehen underlehen huser oder ander ligen gütter besitzent hinder unserm forchtsamisten herren die da gewesen sind zu der zerstörung der schlossen Villarsel und Montenach.

Item werdent die von Friburg widerkerren dem herren von Villarsel und allen andern mannen und undertanen unsers forchtsamisten herren alle schaden inen und ir gütter durch die Friburgen beschachen und durch ir helffer.

Item werdent empfahen in gutter verfenlicher formen von unserm forchtsamisten herren ze lehen und manschaft und von siner hohen herschafft und souorenite gehorsam ze sinde das ime das geuellet alles das ertrich stett schlosser und dörffer die dieselben von Friburg innhant besitzen mugent an welchem ende das sige usswendig der statt Friburg ringmuren hie die-